

Fayecimento di Nando Browne a laga fanaticonan tristo den Caribe



ORANJESTAD(AAN): Diabierna a habri cu noticia tristo ora cu a confirma fayecimento inespera di e conocido artista Nando Browne mihor conoci como “Breaker”. Nando tabata hopi conoci pa su carera musical specialmente como cantante principal di e banda Impak.

Informacion ricibi ta duna di conoce cu Nando a fayece di un ataca di curazon.

Nando a nace na Sint Maarten na 1979 pero a bin biba na Aruba for di un edad hopi jong. For di aña 1991 el a cuminsa subi stage y semper a cosecha exito pa su forma energetico di presenta pa e publico. Entre otro Nando a forma parti di Basic One, Chups Band, Chrome Band, Impak Band y otronan. Algun aña atras el a dicidi di residencia su mes na Curacao unda cu el a labora na Renaissance Hotel y tabata canta den diferente banda manera D Edge Band y mas recien Fyah Band. Pa loke ta competencianan di Calypso y Roadmarch Nando semper tambe a sa di presenta cancionan cu a bira exito.

Cu Impak band, Nando a yega di biaha pa hopi isla den Caribe y hasta paisnan grandi unda cu semper el a saca cara di Aruba. E nivel di energia cu Nando semper tabata dunabo lo por pone para facilmente banda di artistanan manera Beenie Man of Elephant Man. Detaye di entierro no ta conoci ainda. Palabra di forsa na tur familia, amigo y fanaticonan di Nando “Breaker Brown.

SMAC a informa cu Jouvert Morning di awe madruga ta dedica na Nando.